

每週經課朗誦經文（巴克禮台語漢字）2012/04/15

共同經課-1 使徒行傳四章三十二節～三十五節

32 信的人攏一心一志，無人講伊所有的屬家己，是逐項物做公的。33 使徒用大權能，干證主耶穌的復活；眾人也得著大恩典。34 其中無欠缺的人；因為見有田園厝宅的攏賣伊，帶 in 所賣的銀，35 下佇使徒的腳下，照逐人所欠用，分互 in。

共同經課-2 詩篇一三三篇

1 〔上崎仔的詩；大衛所做。〕看啊，兄弟和好相及倚起，是何等的好，何等的安樂！
2 這通比並彼個貴氣的油斟佇頭殼頂，流到嘴鬚，就是亞倫的嘴鬚，閣流到伊的衫仔裾；
3 也通比並黑門的露水落佇錫安諸個山；因為佇遐耶和華有定著賜福，就是永遠的活命。

共同經課-3 約翰壹書一章一節～二章二節

1 論到活命的道，對起頭所有，阮所聽見、親目所看見，所觀看，也阮的手摸著的。（2 此個活命曾出現，阮有看見，來做干證，也報恁知彼個永活的活命，就是本及父佇啲，也出現佇阮的。）3 阮將所看見、所聽見報恁知，欲互恁及阮交陪。閣阮所交陪就是及父以及伊的子耶穌基督。4 阮寫諸個，是欲互阮的歡喜充滿。5 阮對伊所聽的話、來傳互恁的，就是講，上帝是光，佇伊全然無暗。6 咱若講有啲及伊交陪，也行佇黑暗，就是講白賊，無行真實。7 獨獨咱若行佇光明，親像伊惦佇光明，就咱相及交陪，也伊的子耶穌的血洗除咱攏總的罪。8 咱若講無罪，就是騙家己，真理也無惦佇咱。9 咱若認咱的罪，伊是真實公義，欲赦免咱的罪，洗除咱攏總的不義。10 咱若講未曾犯罪，便是互伊做講白賊的，伊的道理無惦佇咱。1 我的細子啊，我寫諸個互恁，是欲互恁無犯罪。若有人犯罪，就佇父的面前咱有保惠師，就是義人耶穌基督。2 伊為著咱的罪做挽回的祭，閣毋若為著咱的罪，也是為著通世間。

共同經課-4 約翰福音二十章十九節～三十一節

19 彼日（就是七日的頭一日）已經暗，學生因為驚猶太人，就佇 in 所住的所在關門。耶穌到，倚佇中間，給 in 講：「願恁平安！」20 已經講此個話，就用手及脅下互 in 看。學生看見主，就歡喜。21 耶穌閣給 in 講：「願恁平安！我差恁，親像父有差我。」22 已經講此個話，就對 in 歎氣，講：「恁受聖神！23 恁赦甚麼人的罪，就赦去，留甚麼人的罪，就留啲。」24 有多馬稱做低土馬的，是十二學生的一個；耶穌到的時，伊無相及佇啲。25 其餘的學生就給伊講：「阮諸個已經看見主啦。」若是多馬給 in 講：「我若無看見伊手中釘的跡，無用我的指頭仔探伊釘的跡，無用我的手探伊的脅下，我決斷毋信。」26 過八日，伊的學生閣再佇厝內，多馬亦佇啲，門已經關。耶穌到，倚佇中央講：「願恁平安！」27 就給多馬講：「伸你的指頭仔來，看我的手；伸你的手，探我的脅下。莫得做毋信的，著做信的！」28 多馬應講：「我的主啊！我的上帝啊！」29 耶穌給伊講：「你因為看見我才信；許個無看見來信的人，有福氣。」30 耶穌佇學生的面前閣有行多多神蹟，無記佇此本冊的。31 獨獨記諸個互恁信耶穌是基督，是上帝的子，信就佇伊的名得著活。